

四庫全書

集部

欽定四庫全書

牆東類稿卷十四

元 陸文圭 撰

行狀

總管王公行狀

公諱顯祖字繼先姓王氏其先澤州之高平縣人也王氏為高平望族宋遼之間簪紱不絕女真有中原或仕或處壬辰之亂盜起河東澤潞孤危祖定避地於邢臺因而家焉定生明字光庭幼有大志燕趙豪傑悉與交

結金遷汴梁河北隔絕州人奉為節度判官幽京被圍
天兵南下太師國王徇地至邢邢人擁州官出迎奏聞
太祖皇帝賜明金符陞本州節度副使明年薨於位明
四子長先卒次即總管公公生庚子九歲襲父職為邢
州節度判官戊申歲也公追念志不就痛自激勵力學
勤苦敏於政事聽斷明審如老成人己未冬憲宗皇帝
出征軍次鉅鹿時世祖皇帝龍潛護駕太保劉文貞公
實從與節副公有舊引公入見公年十四狀貌屹然有

奇偉氣天顏喜悅酌酒賜之謂太保曰此兒不凡汝其
子之中統三年邢改順德府公為府判官如故始受宣
命會山東李璫叛據濟南河朔震動公隨大軍往討先
登陷陣李迄就誅公不言功調衛州判官衛與邢相聞
熟公治行不令而化至元四年調汴梁路同知鄭州事
鄭土狹民貧公撫卹有方鄭人德之七年調宣德府判
官秩滿同知濱州事公進不求名不喜結勢援連為州
佐貳泊如也十二年江南初附維揚久圍不下主帥檄

公領所部濟師城既降公復歸濱兩考終代者不至遂
棄職而去居邢三年復起為同知德州事尋除汴梁路
鈞州尹在任六年威惠旁行陽翟故無廟學創蓋一新
招師取友勸學興化會州境大旱公露禱輒應甘雨驟
降田苗勃興士民各為立碑紀其事二十七年丁母夫
人憂時服制未定公首行三年喪解官廬墓二十八年
服闋行省平章約蘇穆爾以貪刻失民心湖廣騷然世祖
震怒命順德忠獻王達爾罕往按之除公行省副理問

窮治黨與次第誅殛追贓以鉅萬計民大悅官庫被盜
不獲訊及平民株連甚衆公推問得實乃守庫兵自盜
贓證明顯遂伏辜其無辜在縲紲者百餘家盡釋之皆
喜舞羅拜而去三十一年行省委公整治湖南等七路
錢糧蠲無名雜科之賦除有徵無納之額至今民間便
之元貞元年改差濱州州尹公去濱二十有一年矣父
老聞公復來夾道懽迎公究悉一州利害知百姓苦食
貴鹽申請所司今後先散鹽而後支價較之常年可省

民錢一萬二千餘錠官亦無不利焉從之州人受賜刻石頌德時山東鹽法壞亂民大擾朝廷以公才堪繁劇就俾整治選除山東東路同知轉運鹽使司事首尾六載增鹽引一十四萬有奇商賈通行公私兩濟大德九年自山東回除少中大夫江西袁州路總管公慨然曰吾自束髮出仕至於白首險阻艱難備嘗之矣賴先人遺澤幸得不墜今吾老病日迫西山尚夜行不止耶力辭不赴任十一年公年六十九請致仕不報五月某日

薨於私第之正寢公父子有德於邢邢人聞公之喪如
悲親戚公性沈毅度量開豁騎射冠一時好古博雅善
屬文結交當世名士如易濟趙公肯堂王公秋澗盧公
疎齋李公受益陳公吉甫張公孟符郭公百川劉公端
甫董公朴皆深知公者碑陰先友不可勝載卜以某年
某月某日葬於某州某縣某山之原公娶同郡張氏夫
人先公二年卒繼室范氏夫人後公九年卒子四人長
曰都襲父爵授忠翊校尉同知潁州事曰山曰允曰信

山早夭女三人曰璋適侯某曰英適侯某曰娃適李某
孫四人曰祐曰延曰玆曰寧皆長出校尉君再任江陰
州判官挺挺有父風一日泣告余曰某不天早孤失業
惟是先考君筮仕五十八年歷任一十有六不為不久
嘉謀善政不為不多家乘散軼弗錄不孝是懼今僅裒
輯一二大畧敬以授子子為我狀其事余辭有二難焉
南北異疆隔絕久所傳聞異辭一難也先太師鴻名盛
烈宜牒考功請謚牒史館編錄皆於狀取信必得當世

鉅筆以發揮潛光顧衰老淺陋弗稱是二難也君曰毋庸吾屬之子矣不獲已乃撰具歷官行事次第登諸冊以授使者有司採擇焉謹狀

家傳

陸莊簡公家傳

原注代其子鏞作

先公諱庠字仁重陸氏世為吳郡著姓常熟一支不知始所徙八世祖諱景山遷暨之化成鄉今為江陰人曾祖諱英才妣王氏祖諱大昌宋承直郎監慶元鮑埼鎮

妣李氏考諱渙江陰軍安撫副使妣蔣氏先公安性英
悟學問絕人有經世之才既冠值乙亥丙子之難江浙
寇盜蜂起安撫公招集民義捍衛鄉井公實左右之天
兵南下暨當衝要公隨機應接境內帖然版受江陰軍
判官事定朝京師授四品官朝列大夫同知徽州路總
管府事時至元十六年也始至新安人疑其儒家子少
不更事易之公留心政事發擿奸伏人以為神民有訴
其山鄰軼界若干丈者官驗之良是命歸之公疑焉曰

吾聞揣高者以約法不以尋丈計也安知訴者不更贏乎合兩家質劑互審之果然訴者乃伏又有爭山葬者各指一塚莫知歲月遠近公視之曰必發而塚爭者曰法不許也公曰吾故欲發之何如爭者變色公命具畚鍤爭者逸迫而視之虛塚也縣解官錢止驛舍或竊負而去莫知主名公呼在行者詰之指其一日訊彼一訊即伏贓具在或問何以知之公曰吾覘其容止耳官命造舟江東諸郡集昇之龍灣公白宣慰司歛居萬山中

道遠莫能致請就太白渡便從之役中止又欲運材之
良者赴北公又持不可未幾宣之旌德卒以募民徙木
召亂至調軍招捕乃定公在郡四年始代人追思之二
十五年授朝請大夫江東宣慰副使時權奸秉國罔利
析秋豪符檄旁午公据義力爭度不勝遂謁告去二十
六年改除江南浙江道提刑按察副使浙西人物浩穰
土俗浮侈公風裁清高剛腸疾惡一繩之以法無所迴
避海運萬戶之子緣私逋久繫編民公捕而笞之州縣

吏坐侵漁百姓者劾去數十人追贓以數萬計單車所
至貪饕側目豪右斂跡最後分司杭州杭故都尤號繁
劇難理是歲饑詔發廩粟十餘萬賑之公親監視給散
人蒙實惠郡侯及通守挾威恣橫公廉得賣鹽鬻獄等事
捕繫其人名官稱疾不出公操之益急申行御史臺傳
其職時權奸既殛奉御帥行省官兩監察御史就故太
常寺起詔獄窮治其黨與籍其家貲差委絃然通守因
求自劾竄名寺中反以飛語構公公面對白發其奸奉

御以下皆是公然事浸解會織染局官以賄敗事連行
省譯史及胥典十餘人公移文右司指名取之既至一
夕歎服左司不善也誅參政公謂分司不當按省吏以
違制論將奏其事先使人詰公公曰右司吾予也又詰右司
左丞公獨曰分司不得按省吏固也吏果受賕御史亦不
得問耶公聞之乃以成歟上御史府營救者甚衆御史迫
清議具獄已成不得變乃速決之參政及左司怒然無
如之何適使者至參政以他事獲譴胥靡之而去有識

相謂昊天不祐凶人矣居無何按察司罷改肅政廉訪
司公以例去既抵家乃營舊圃按行松菊建閑居堂燕
喜亭歲時奉親輿逍遙娛宴堂後古梅數十株苔幹槎
牙築臺其上本心文公書其扁曰天與清香日與賓客
吟嘯樂飲若與世相忘者久之起除中順大夫同知台
州路總管府事入境聞簫鼓聲訝之乃郡人聚衆立社
以迎鬼神者殆數千人公杖其為首者舁主木偶投諸
江人大驚視事未幾閱牘有未具者悉釐正之罪人有

淹禁者立理出之州長官束手受成然以其清直弗敢
較在郡六十餘日以元貞元年改江東建康道肅政廉
訪副使公治辦有聲故省臺交薦爭用之公益感激自
奮風采愈峻部使者因市紅藍受賈人金公首劾之有
奉特旨造浮屠像者威脅官吏攫取金帛逾五萬錠公
又劾之其他糾彈甚衆人多怨者值檢覆州縣水灾檄
一令與俱令實病不自言扶曳上道邂逅身殞怨家挾
其子訴謂公實死之公不自辨用事者將中以危法公

不知也在鄱陽日思太夫人年高陳情歸養士民泣送
舟過湖口行省使者將命逮公不知公在也風帆迅駛
交失之暨入城公已去使者曰余知其無罪也而用事
者遣余天相之矣以追不及還命使者獲罪公不還家
逕北入都詣臺自理臺中人皆知其無罪畏用事者莫
敢言會國有大需乃得釋尋降三官授朝列大夫嶺北
湖南道肅政廉訪副使公辭不可不得已就道湘楚去
京師遠蠻徭雜居人不知法俗尚競渡歲多溺死峒丁

盜牛畜因相關訟公皆厲其禁警捕官捕盜拒捕格殺而取其首盜反誣以故殺久繫獄公問釋之里婦獨居夫不在僧出入其家或誣以與婦謀殺其夫指道旁尸為驗僧不任答乃誣服囚之六年公閱其牘尸死以夏月猶衣冬服疑之根問得實乃何人先數月受杖而踣於道者非夫也破僧械留圜中公歸之明年吏有部送征蠻糧過湖北者見其夫實存與之歸僧乃免公所至平反非一事此其尤著者也長沙部十郡公按行其九所至

宣明風化敦孝行禁浮祀為首溪翁山獠駢首聚觀至
今談公者以手加額先是宣慰副使某受賂覺諉罪其下
許代之償既而斬之無贓可徵其下自言公閱實卒正主
罪先是行省欲削風憲之權請自今有罪者分司與民
官居廳審問然後結正迨同審輒翻異公患之及宣慰
副使敗公以為言御史臺奏聞有旨革去新例廉訪使復
正其體自公始公固倦游又以侍親棄官歸逾年陞中
議大夫海南廣東肅政廉訪使嶺南有討叛積功至大

官者貲累鉅萬奸賊狼籍民重足立不敢言臺憲纔一舉
按輒反噬至是事發御史置獄維揚逮者相望某官崛
彊不敢出鎮公至行臺稟方畧人為公危之公曰是何敢
然吾仗國法驅之耳船至番禺遙望有盛服罄折俟水
濱者偵視之曰某官也公使辭焉至驛請見又辭視事
之日某官來賀升階請受事公辭曰均王官也不相統
攝請毋勤姑歸治行明日訴某官者至公視某牒皆譌
詞卻之不受又明日訴者沓至如前復却不受某官喜

曰公不害我矣蓋前告者皆某官遣為之以嘗公公識
其情置不問乃肯就逮北出英德百姓覘其去始稍稍
出自言敢吐其寃公按問得不法事數十條絡繹呈臺某
官聞之嘆曰吾他日復得南歸若種當無復遺其暴如
此御史問未竟索其獄赴都尋赦不誅人以為恨公在
廣南脩古廡吏祠免儒籍差役增贍學地租請復恩館
田賙北客之死南荒而妻子不能返者請留舶貨在舟
市易免擔夫跋運之勞請禁官吏詭名行鹽奪估客之

利者為政暮年復以侍親棄官歸公自初筮仕凡七拜
宣命四握憲節持身廉介遇事果斷洗冤澤物興利除
害不可殫舉性至孝居家侍太夫人朝夕不離左右親嘗
甘旨三仕皆以就養去職諸子纔勝衣者即使就學招
明師訓之身自程督嚴甚治家整而有法內言不出於
相外言不入於相家人十指給廩稱事喪祭一用朱子家
禮不諂鬼神不佞老佛扁所居齋曰義嘗曰吾平生受
用義字不盡待宗族尤有恩指私租倣范文正公立義

莊法計口而散之婚嫁喪葬皆有助農隙則聚里中子弟設塾而教之患差役不均為之區畫先所居化成一鄉始立式推排除詭寄虛樁之弊分戶九等各出助田若干計粟若干以身為率先後差次每歲以三兩戶應充里正主首即以義粟與之收斂破除皆有籍輪一人掌之歲終會其成約數年後義粟有羨乃以置良田如義田之數以所助田還其主行之二十年鄉民享其利皆讓不爭守其法至今不變它鄉以役破產者多矣皆追

思之而莫能繼之者凶歲發積散財糜粥以飼餓夫不足則貸諸姻家以續之故家無餘蓄個儻周急樂施不倦豁如也與人商論不能屈摺皆鑿鑿實語不相褻狎亦不可干以私公家居官府不敢為不善事有疑輒質於公公亦檢制下人不以一毫擾官府間黨有爭多不詣州縣來取決焉公平心剖其曲直勸之以義皆悅服而去尤愛敬士類迎門倒屣討論經史娓娓不倦作詩學少陵詞喜稼軒下筆往往逼真在五羊任所得瘴熱

疾醫投以附子乃愈洎出嶺精神稍減於前踰年舊恙復作不敢復以烈劑繼之寢疾數日而沒弔者皆哭失聲識與不識皆歎息曰善人無所恃小人無所忌矣公生寶祐六年戊午之九月薨於大德十有一年丁未之六月享年僅五十是歲九月葬於州之寶池鄉定山之麓延祐五年覃恩贈嘉議大夫上輕車都尉吳興郡侯謚莊簡公初娶江陰縣丞趙公慶胄之女早卒繼娶昭勇大將軍廣州招討使湯公忠信之女俱吳興郡夫人子

男七人曰鏞鏜銓鎰鑄鉉錡女幾人孫男幾人孫女幾人初鏞與先公昆弟也先大父安撫公棄世時鏞尚幼先公未有子大父謂之曰以是為而子善視之故先公愛鏞特甚不啻自己出嘗曰吾非利其財異日當以田產半予之先公既沒鏞次當襲爵讓與弟鏜又以所居大第讓與諸弟而出居屋之西偏於是湯夫人畀鏞以先疇之半遵治命也鏜今為承務郎湖州德清縣尹銓為登仕佐郎規運提點所大使餘未仕先公之葬也速

故不及請銘於當代名士日月逾邁往來于懷姑述梗概藏諸家傳以俟太史採擇

祭文

祭運糧陳總管文二首

嗚呼一貴一賤交情乃見通家子弟異邦姻眷一死一生乃見交情笑談在耳慟哭失聲瑰竒之能卓犖之器居家而理居官而治駟車佚老墻翬華終哀榮始末世孰如公胡不百年云何一夕聞訃罷市行路喑喑生芻

致莫匪我愆期衰疾無堪止或尼之乃褰帷堂肅拜公
像追懷疇昔吾將安仰魚龍海水忽變枯桑白骨無言
寒沙茫茫朝華夕悴古今共歎沒寧牖下公復奚憾
嗚呼生死之理通乎晝夜之道辰自子以至亥人自幼
以終老達者觀之則商彭不為壽魯顏不為夭蓋福祿
之易求而身名之難保寄空榮於華屋棲餘寃於衰草
長夜漫漫白日杲杲百年鼎鼎萬古浩浩如公學問之
素充才器之獨抱負萬斛之舟而自任者重養千金之

軀而不銷其寶蓋其冑中所得已多彼螭蛄青松是區
區者俱無足道某之所恨前哲之日凋而典型之莫考
念通家之契濶空臨穴而哀悼死者有知觴為余醕

祭袁國華文

嗚呼哀哉生死有數聚散無端中身之壽行矣樹檟同
心之友傷哉刈蘭憶凌雲之雅操懷竟日之清歡得句
花落銜盃月殘止客投轄倩人整冠置驛慕鄭命車奉
驪提博局以爭長擲布袍而戲謾或掣床而怒弼或賭

囊而負安抱雋才而莫試聊放跡以自寬奈黃梁之未
熟驚落枕於邯鄲自悼亡之戚戚鬢中白其似潘耒疾
浸淫尊足蹢躅遂放柳枝凭几靜觀一夕昏霧入人鼻
酸君乘葉舟冒此奇寒正脉中虛厲氣外干扁盧束手
藥盡技殫棄白日之旦旦即厚夜之漫漫嗚呼哀哉某
等交如金石語出肺肝死生契濶况也永歎薄言往奠
一慟撫棺傾淚填膺書此血丹

代祭朱南伯文

嗚呼巨卿元伯之約素車白馬之馳載在史漢人以為
疑要之朋友之義垂死不變而精氣游魂之感理或有
之嗚呼友誼且然而況於親戚之悲乎君之妙齡問學
最優諸老避之皆遜一頭嗟予生晚又不及諸老之門
惟視君為前脩君既忘年辱與之遊而三星東楚方結
好於綢繆昔歲在蛇君疾弗瘳我登寢門竟日遲留握
手別去遂往南州聞訃旅中涕泗旁流梧桐再華歲籥
已周君歸玄宅青松一丘祖道持觴君能飲不

祭趙一山文

原注代其子作

嗚呼哀哉吾父生平竟有何樂宦途齟齬家事消索淒其老懷寄此清酌忘形一醉適興自然嬉笑怒罵白眼青天中山千日屢呼不醒豈期一夕無言長暝嗚呼哀哉祖母年髦弟妹童幼不肖何怙號天莫救日吉良辰輶車啟行薄暮一奠血淚如傾事死如生情敢不厚哀哀我父能復飲否

代祭叔父文

嗚呼叔父壽七十餘不為無年子又生孫不為無傳緒
經閱古蓄學不為不富杜門掃軌抗節不為不堅所可
痛者宗族無睦姻任卹之老鄉閭失仁厚忠信之賢攷
叔父之生平感世事之輪雲俄千金之易散惟一瓢之
獨存雖室人之交謫公笑談如不聞豈小智之可窺信
大雅之不羣今茲已矣空復何云某等幼蒙教育頭已
白絲追念疇昔幽明遽分輅車祖奠漠漠營魂血淚落
俎言不能文

代祭南坡文

原注甥祭舅

嗚呼我先君子講授於鄉舅氏從遊入室升堂實以伯姊來嬪於楊婚姻之重師友之良百年相好一日可忘遭家不造孤在新喪舅氏獨存魯殿靈光我見舅氏我心悲傷如母存焉感詩渭陽今其既亡使我涕滂嗚呼哀哉如公心平而直氣和而剛稟質之渾厚操履之端方宜乎善積而慶壽永而昌義氣聚一家之樂文字發諸孫之祥天之報公八十之年不為天人之望公千歲

之日不為長奈身非比於金石安能保於無疆嗚呼哀哉公之將殆易華睨於正寢屏粉黛於洞房自誌墓銘生求挽章哀怨盡消於淮海曠達尤過於柴桑挽古道以自期豈今人之可望某所痛者喬松已老凋零繁霜弱羽無依中野旁皇懷舅甥之繾綣隔生死於蒼黃滴茲血淚來奠一觴同心盟在白水茫茫

代哭外舅杜威州文

某昔官於公之鄉乃識公見其容貌恂恂服用簡質夷

考其行其鄉之人曰如其服若容訪其親知則皆賢士大夫也余心降焉而未得交也後數年取公之長女公不我棄遠道送將暨余於居凡三日穀敷祗論心情義款篤始至如平生且別戒其女曰往之汝家善事爾長相爾夫子其儉共是務既去則又數以書來會期我乎暮之春要我乎其家其悃悞無華亦如其服若容余將撰日月以婦邁乃季春之四日致土之毛遣人問無恙未三十里而反公之家之隸遇諸途來訃公喪矣致書之

日而公死之明日矣踉蹌挈婦晝夜倍道行百八十里
逮至而不及馮其棺矣余外姑以公之二子衰而逆我矣
吁嗟天乎為善者果不必報乎報而固若此乎三十年
州縣以考進階階不過外郎以資受任任不過二千石
今日藩臣以威州奏可而明日公寢疾病以死天胡奪
之亟乎循公迪彝不事矯競不見知於世固也而蒼蒼
者未知之乎善類惋嗟里閭驚愕而況余舅甥之至情
乎薄奠不腆公乎其尚能飲余酒如疇昔將爾子以過

余之日乎

代弟姪甥祭亡者文

先君鍾慶一女三子李弟先亡惟兄是恃兄之才德妙
年挺出孝於事親友于弟姪舅甥之情尤親而密意團
圞於晚歲舞共樂於斑衣胡傾逝於一朝空物是而人
非嗚呼夜雨之床猶疑對話白水之誓無復同心棄杲
日之耿耿即厚夜之沈沈命也奈何天乎無辜惟堂泣
鶴髮之母聖室抱雛嬰之孤某等親親之義生死不忘

有淚如傾敬奠一觴

代人祭王郎文

嗚呼才子王勃舟次南昌詠落霞與秋水弔陳迹於滕
王知閻公之得壻殊不讓於子章奈陰幣之雖焚嗟宿
債之未償豈行儉之先見偶墜舟於海洋嗚呼人事悠
悠天理茫茫彼愚而壽此哲而亡予牖下之季女萱草
凋於北堂求君子以偕老嘉坦腹於東床差穀旦於鴻
鴈期天桃於春陽忽東野之馬佚欲濟川而無梁痛逝

者之如是慨予懷之永傷嗚呼白日冥冥碧水泱泱結
桂為旗芙蓉為裳乘雲上下與波翱翔儼雀屏其改素
昏玉鏡而無光予女身未得以奉箕帚之役義不得以
薦蘋藻之芳生芻一束予子是將敬酌馮夷共此一觴
代祭懷德岩長老文

嗚呼佛法本空來無一物去亦無一物隻履翩翩行彼
西方日沒處乃沒我等大眾不了生死猶惜此枯骨愛
緣心生禮緣情起不恁麼不得桑下三宿猶自戀著况

同居一室運水搬柴諸妙用喫盡師氣力茶毗烟裏光明現成佛不成佛

祭表國華母文

嗚呼昔者孟母其居三遷有子如軻遂為大賢軻之喪母也後喪父也先所以棺槨衣衾之美貧富不同後踰於前惟靈淑懿之姿慈儉之性不可得而見焉然積善餘慶素鍾於天故身沒之後子孫百祿如瓜瓞之綿綿春秋享奠牖下之屨幾滿而惟堂之殯弗克舉者二十

餘年豈陰陽之避忌或時月之拘牽今者協禎祥於龜
卜啟吉兆於牛眠爰停車於中野永瘞玉於重泉某等
鄉邦子弟獲締姻連薄觴一奠生死怛然瀧岡宿草方
表新阡

祭表國華妻文

惟靈遊宦從夫於蘇於杭春花亭秋月在房聚散有
期哀樂無常百年偕老一夕云亡昔日辭家羅襦下堂
人今不見丹旌回鄉嗚呼哀哉續絃無膠返魂無香賢

哉伯鸞失此孟光西風流水不哭神傷靈兮來歸歆此
一觴寒花淅瀝曉月微茫嗚呼哀哉

代祭孺人湯氏文三首

惟靈生自儒家嬪於名族姆傳婉婉閨門雍肅采葛歸
寧之意樂舉案齊耆之義篤子策駿以遊宦孫垂髫而
習讀期六珈之偕老享五鼎之厚福夫何藁砧先逝惟
堂遂哭未終日月之制復值木風之酷驚疑甫定憂患
相續嗟百齡其未艾遽一夕之不淑某等同里婚聯通

家姻睦痛死別之傷懷想音容而在目薄言鷄絮一奠
江曲

嗚呼哀哉生存華屋零落山丘古人同悲今此其尤藁
砧之喪相繼於中壺同穴之義尤慘於柏舟寧帷堂而
重弔不歲籥之再周某幼而同里長也依劉受上床之
獨拜陪東閣之英游晚締婚於仲氏托松蘿之綢繆云
胡一夕闕此千秋嗚呼哀哉年光過隙人世浮漚感念
疇昔我心百憂隔州之山鬱鬱松楸殯宮雙奠淚灑江

流

嗚呼哀哉先君之喪靈几未終女兄之卒血淚霑霄天
乎何罪降此鞠凶惟靈體閨中之秀有林下之風溫柔
良善貞靜懿恭幼鍾愛於家君長擇配於華宗教子之
嚴斷機於孟母事夫之敬舉案於梁鴻意百年之偕老
何一夕而俱空匪桃夭之家宜乃大車之穴同嗚呼哀
哉手足之情抱恨無窮舅甥之義敢不盡忠冀死者之
有知俾降心以相從此言可質白石青松

代夫祭妻文


嗚呼哀哉夫婦之義著在三綱死生孔懷不言神傷昔
君來嬪逮事姑嫜孝養無違迄於終喪手鞠二雛訓以
詞章長也不淑季也在傍女歸寧家婦饋下堂意其晚
節享壽而康豈性太慧故命弗長嗚呼哀哉君疾甚危
醫庸弗詳始於憂勞七情內戕乘以驚疑至於膏肓回
生無丹返魂無香嗚呼哀哉舍西百弓水遶龍岡汝生
所命卜吉而藏輅車在野寒日無光嗚呼哀哉吾今而

後撫而子女念汝之自出眷汝姻戚如汝之未亡百年
同穴此誓不忘靈具有知來歆此觴

代祭某氏文

嗚呼上壽百年止三萬六千日靈之享壽八十有九去
百年而咫尺雖蓋棺而無憾終遇變而哀戚惟靈生自
名家嬪於華宗溫柔良善貞脩靜恭懿厥哲婦如水如
玉洵美且仁命也不淑藁砧先逝衆雛亦飛孑孑弱質
靡室疇依瞻彼西方瞑目長歸某遠道言旋入門驚訃

總車素幔空堂日莫寄哀一奠寫淚如泉清酒在壺嘉
實在邊魂兮來歸有風肅然



欽定四庫全書

集部

牆東類稿卷十五

十六

詳校官中書

臣

閔思毅

主事臣呂雲棟覆勘

膳錄監生臣溫廷鑑

欽定四庫全書

牆東類稿卷十五

元 陸文圭 撰

四言詩

題鄭子質秋溪釣雨圖

原注江晚漁歸鄭谷能詩未能畫也今子實乃

能之耶四言八句聊戲一笑

水墨淡淡煙雨濛濛溪抱前山人倚孤蓬我懷季鷹感慨秋風身羈洛下興寄吳淞

題猿石手卷二首

空山暮雨枯木曉霜此處聞聲若為斷腸
楚山無人羣戲樹顛或據大石如君長然

五言古詩

讀史

魏延及楊儀兩人蜀俊乂各懷專妬心曲直竟誰在孔
明惜其才未嘗輒偏廢渭南反旆歸師在千里外朝臣
意左右魏為楊所害楊亦不得死晚用姜維輩蜀竟以
是亡束手付鄧艾艾復矜其功受制于鍾會四人共一

律皆以專妬敗家國莫不然嗚呼可為戒

李杜

子美坐同谷太白走扶風雖遭倉黃急轉覺吟咏工首
亂者羣憐貽禍及二翁因知漆室女發論乃至公觸事
機難審臨危計易窮川原愁夕照草木因西風鬼馬如
龍游鬼妾如花紅變滅不須史焉能保其終擇禍莫若
輕老遁林谷中

賦蕭仲堅所書汴梁節婦事

汴水流濁黃美人如冰清案無伯鸞夫袴無趙氏嬰姑
老扶上床夜寒機杼鳴停梭獨太息莫把鴛鴦織織成
孤飛鴈離羣不再匹河東柳家兒抉眼去其夫愚者生
不諧直者死不渝太師漢復周相國秦又楚嗟哉二丈
夫愧此一癡女

謝詹中美惠五典疏蒙書

山上有佳木春風抽新萌勿縱羊與斧條葉隨敷榮山
下有流泉涓涓滴深清勿投泥與沙支派任縱橫物爾

人亦然習與性俱成位可望賢聖教乃始孩嬰五典叙
千古一編粹羣英屬辭不厭巧立義不厭精金玉二三
子源委諸老生寒燈讀未竟眵眼開雙明惜哉書晚出
會使世盛行價知貴洛紙報愧之齊瓊

得已堂

為已終成物為人適喪已得之以為重喪者深可耻與
其乞墻生不若蒙袂死貧賤勿失色富貴亦勿競窮達
本無心安於義與命人受命於天顏孟獨能正

性齋二首為分湖陸提舉作

孔門性不聞學者失其義上中下為三善與惡為二鄒
洛異而同韓揚同而異不指理不明不兼氣不備理無
智無愚氣有駁有粹本體在涵養工夫由克治立義以
居敬存誠以去偽曾思兩卷書學問千古事性外無餘
天齋中有樂地

吾宗家湖曲虛齋納天光清源瀉活水中有菡萏香我
欲袖兩圖再拜升公堂先天揭右序太極列左方見草

憶春陵看花思洛陽花草各有性指圖試參詳

怡顏亭曹若晦子無易為奉親作

冬青有何好婆娑歲寒姿每愛淵明白獨樹乃為奇朝
陽紫翠交夕月光陸離幽懷聊所寄宴坐輒移時陶寫
得真性絲竹亦何為歡趣不自覺況令兒輩知

雜詩五首

田叟不知書指望升平年一生把鉏犁忽聞鑄戈鋌早
晚征徭起驚訛走相傳腐儒寒窗下風雨正勦眠

夜半更相呼巷南連巷北人語何喧喧陰風何率率猛
虎下山來按尾逐不得村中雞犬盡行擇小兒食

何處人夜歸一犬穿籬吠狺狺聲四起似各應其類月
寒人影空帖耳循牆去家家防穿窬披衣不得睡

秋聲何颼颼乃在枯柳邊疇昔韻鸝鷯歲晚棲窮蟬張
緒少年時春風正可憐流光不相待白首淚潜然

定遠未封侯發憤投其筆老儒七十餘毫禿手不釋才
器有長短志器各自適遙思玉關外萬里風沙隔

次善卿雜詩五首

貞女不自媒蛾眉為誰掃春風吹年華閉戶綠芳草靈
脩不我顧覽鏡紅顏槁焉得北堂萱聊用寬憂抱又懼
青蠅讒善使黑白倒遂令親者疎我欲俾有昊

東坡譏舉子有類候蟲鳴退之譏詩人謂作蒼蠅聲制
策直而核聯句新且清自作復自譏持論終未平無人
解此意起我懷古情

蛙從井底語豹在管中見若遇大方家一笑真自獻饋

漿意已驚抱甕力殊倦因知巧若拙頗覺狂次捐玉以
德保瑕珉以多故賤

火雲吐赤日旱勢千里濶古人救荒術貨食知本末家
家弄口賦殆類僧持鉢激水活肆枯植木蔭道暍諸公
善努力赤子正飢渴

棄兒啼草間瘦妻卧路傍公廩已告匱私戶猶多藏嗟
哉守錢奴盜竊勢且昌莫保千金軀汝富安得長鍊炭
不及炊寶玦空自將獨有黃巾寇不入鄭公鄉高賢古

所貴薄俗今可傷

婺州傳仁贄詩求見依韻和之

髮燥始出游心期結明主天方窮畸人不喜生語絕
絃恨伯牙抱璞泣和氏獨憐身皓皓不救俗靡靡競趨

聲利途孰蹈仁義軌寘之勿復道作者敢竊比

原注米詩鄙班

馬而況
孟氏

婺女寶氣明箕尾德星聚

原注謂
傳說也

雜還貢棘闈

高明識芝宇鑑衡付有司尺度失奇士少需知我者一
第溷子耳瓠樗嗟無用車斗可勝數老矣何能為歟然

徒自視安得善及人共勉學為已

和陸振之見贈韻

我懷陶元亮早棄彭澤令寧甘柴桑餓不受宋人聘晚
詩題甲子統著義熙正得書晉徵士千載論始定吾宗
佳公子世祿讓千乘高眠九思齋清節故可敬寄來傳
雲篇詞與意俱勝耿耿好賢心頗似緇衣鄭居家未得
閒歟歲講荒政良苗困螟螣兇暴過集境閭里不聊生
一髮寄微命閉閣憂攢眉懷哉我同姓惜無勲業志不

必頻看鏡吾衰畏殘暑一雨秋意盛拏舟沂流歸帆飽
風力勁田蕪且莫問但恨荒菊徑明月近中秋雲掃天
宇淨素蛾惜皓髮把酒呼不應何當共攜手盡此南樓
興效顰輒捧心拙句酬佳詠

和丁師善韻

原注時奉
省檄檢災

輟鮑活斗升莫向肆中索已無秋成望况復歲暮迫蓉
城一小縣舞袖折旋窄針芒萬畝青席卷一川白苦腸
真食蓼枵腹思啖栢蒙袂嗟飢氓胠篋畏暴客將懷轉

登憂誰任求芻責為政推仁心匹婦無弗獲登途祇王
命東西固不擇漢網殊濶疎掛一直漏百但令大綱正
潛使宿弊革斯民本同體難以一膜隔發奸雖有術救
急豈無策不憚原隰驅要知閭里阨消平蛇龍居安集
鴻鴈宅庶免愁歎聲謠誦涕廣陌

辛卯二月記異

客子遊吳中步上姑蘇臺是日天雨土四面集全埃微
明日漏出半朗風吹開癡兒戲團沙智士疑劫灰天意

復如此人事信悠哉

有感

六月南風盛秋意雖未多長養會有極搖落將如何
高槐鳴衰蟬况乃蒲與荷一老坐太息羣兒笑且歌
笑歌恐未終歲月已蹉跎

春日不出

春風不著人微寒帶微和落梅枝上稀桃李園中多
桃李尚為容青草被陵阿時至氣自應美惡同一科
無聲

花蝶拍有韻山鳥歌老人閉門坐如此景物何

清明日偕趙雲壁張仲實顧伯玉張見山游分
韻得好字以百家衣補之趙故嘉禾宰今為學
官坐中多及學校事

清明花亂開今日風日好吾得及春游相期拾瑤草城
市多囂塵客衣日杲杲何時一樽酒且試開懷抱王孫
丈人行生世何用早為樂當及時蹉跎覺年老虛名復
何益棄捐勿復道但願崇明德藏身以為寶

三月旦日出遊

季春已一日寒氣猶襲人齋中偷小暇陌上追餘春金
華古精廬幾劫化微塵入門何所見脩竹出牆鄰迤北
過崇明殿閣何嶙峋山房閉不啟俗客來輒嗔徐歸偃
藤床息我定力勻殘書了一卷古意含酸辛山茅聊止
渴起淪石泉新

三月一日偕善之無逸遊南山桃園分韻得源

字

白雲起南山隨我度溪園園丁荷鋤去季女出應門汲
泉供香茗掃石開清樽人靜禽聲樂春深花事繁蛾眉
映修竹掩袂嬌欲言吾親白雲外未敢訪桃源

癸卯二月仲實諸人游野外飲花下得家字

散步逐芳草小酌慰殘花土銚野人居茜裙蠶婦家汲
流澗水渾挽樹花梢斜園童貢新蔬復邀啜盃茶我興
偶然盡汝意良可嘉

申港道中

兀兀乘肩輿西風掠老鬢雲凍山色暝水寒江聲近籬
根盈尺雪晴釋纔及寸人事日相酬客路歲將盡急歸
掩柴門地爐撥餘燼

茅山道中

蜿蜒西北來土阜餘百里怪石聳巉岩勢距三峯止大
峯東南傾中峯伏龍起綿綿亘不斷小峯平而峙名雖
漢代立山自開闢始我來春雨餘峯色有如喜綠鬟光
可鑑榔沐初出水縹緲三僊人婆娑一老子情知隔凡

聖頗亦達生死埋金何必問採藥聊復爾洞乳滴丹泉
手掬嗽吾齒

游崇禧觀南塢真人置酒索詩

粉牆繚而曲轉入寶珠林卷簾爐香出竹日淨沉沉天
人一代師功行夙所欽掀髯顧我笑呼酒得細斟雲厨
薦黃獨飽慰飢蟲吟相攜鑑正室試聽玉泉琴

京口訪郭義山出示陸丞相遺墨

寶祐丙辰榜季世尚詞章功業已衰謝氣槩猶堂堂壯

士死海島尤勝死雒陽遺翰落人間姓字透紙香甲子
行一周復見文運昌遺黎存一二往事空茫茫寒燈客
窗夢飛墮礪山洋留眼看中原且勿悲故鄉

渡黃河舟子作難久之乃渡

四瀆水中大尋源河最長未必通漢津支機事荒唐導
流始積石以西入要荒龍門久東狹橫潰走徐梁奔流
俟其定勢可一葦航我來桃源渡渾渾流濁黃艤舟不
肯濟奈此黃帽郎石瀨投千金貞女可憐傷

宿遷道中遇雪

登車宿遷北萬頃鋪瓊田黑雲湛水光上下玻璃天六
花時時飄集我車上羶左右拍手笑翁似白鶴仙失却
翁白髯頓覺翁少年

入杭苦雪二首

雪天無晨昏尤難辨西東高低賦萬象偶爾一色同會
覩日與月終愁雨兼風居人掩關卧况乃逆旅中買薪
呼斗酒鰲頰生微紅

年年西湖上梅柳得春多
新正十日雪重陰壓微和皓
潔混泥途輕盈赴寒波
危橋驢失脚不如坐吟哦
推窗無傑句奈此玉峯何

至元重光單闕之歲
春正月隴西郡太夫人介
壽八十子侍郎帥其昆弟子姪內外姻族寮友
賓客奉觴上壽如儀州人士相與嘉歎爭為歌
詩詠其事而繡使紫山胡公為之序云

斷機碎錦纈短髻剪青絲
殷勤謝師友老婦得佳兒
長

宦客四方鶴髮在高堂安得凌風翼高飛至母傍春暉
不可報萱草日日長今夕知何夕門有車馬跡堂下羅
鐘鼓堂上合賓客春風吹綠酒起舞兒獻壽客問年幾
何舊歲七十九此去三千年蟠桃始開花花開又結實
瑤池度歲華客起再拜言遺核幸分甘小人亦有母八
十又加三核中有瓊漿飲之勝啜菽懷歸滿袖香仙霞
燭幽谷

壽理伯雍同知

理侯人之父亦復兼母慈東吏如頑奴煦民猶嬰兒閭
門無雜賓鈴下生蛛絲內聞讀書聲日晏忘晨炊上馬
出署事坐看棠陰移人靜報休衙閉閣方退思廷中相
戒言慎勿干以私但祝公百歲長為良吏師公言撫字
勞良吏安可為方當上印綬自與赤松期

壽李仲明同知

新息父賈彪南陽母杜詩東吏如官奴護民如嬰兒李
侯妙政術千古同襟期高寒月半弓清粹玉一規掘菜

朝為薤脫粟暮作糜但聞讀書聲不聞兒啼飢褚衣敝
再浣櫪馬瘦莫騎今朝侯生辰父老持酒庖厨傳寂如
水不知侯所之介壽古有言此意亦復辭獨立古梅下
遙赴天仙期

庚寅臘月二十九日餞孫晉卿宿清孝里晨起
呈岩隱

驅馬四十里悵然臨別情舉酒坐太息歲月空崢嶸河
流日浩浩此地幾送迎老我白板扉卿等致太平窗風

吹酒醒起視天未明小星爭餘光殘月西南傾

皆山樓分韻得坐字

無詩山不喜無樓猶自可樓上著詩人青山皆屬我得
句山禽鳴落筆山花隨翠屏招我隱欲往輒不果推窗
呼與飲醉吸雲一朵須臾成五采吐出驚滿坐

為劉君符賦樂山詩

山體本至靜仁體亦如之樂者有深味魯論無費辭目
玩唯自得心契若有期逝川同一旨妙理無容窺劉公

本好古雅志非好竒諸君為著語殆類愛山詩泉石涵
清思松柏媚幽姿古來山中人此道未必知蠟屐母乃
癖拄笏殆成癡獨有首陽高薇苦甘如飴得仁即無怨
千載真吾師

壬辰端陽後一日會潛齋以竹深留客處荷淨
納涼時分韻得淨字

日透朱櫻明雨拭白蓮淨布席開清樽授簡遞新詠謀
樂須及時養拙聊適性傳聞度遼師鎧甲冒暑盛

贈劉宗道自金陵來遊茅峯

君家汴水陽，弔古游秣陵。秦淮映江月，歷代幾廢興。古
人所樹立，令人愧未能。嗟我搔白髮，空齋對書燈。邂逅
接餘論，談笑得良朋。我如蜩與鳩，睨鯢化為鵬。歲晏落
蓬蒿，安得齊飛騰。東望積金峯，春遊記吾曾。鶴仙遲子
來，丹井嗽寒冰。

贈翟良甫洛人南遊

溫洛天地中，父老升平年。清游盤石坐，

原注謝絳游嵩山寄梅聖俞書

醒酒落花眠

原注邵伯溫聞見錄

勝地已陳迹故事空遺編銅駝

泣秋雨禍機始杜鵑耆英日凋謝嵩少無人烟懷古笑

我迂慕學嗟子賢購書或千金卧榻餘一氈低頭肯揖
吏閉口不言錢情已寄丘壑足猶履山川駕言遠尋師
胡為近捨旃煌煌邵程業百世誰能傳

贈柯山夏梅月

五星配五行占法具春秋參以四暗耀不知始所由經
緯十二辰一國係一州三河即豫地係宋復係周晉自

居太原衛本都帝丘借問益與并古有二國不三晉俱
屬冀韓衛不見收嘗以扣日者不語輒掉頭渠未通古
今敢問儒者流氣化互生尅躔度有遲留因之別貴賤
庶人與王侯既云命在天何以身不修經籍古格言較
此殊不侔殃慶有所積禍福皆自求理數各一家二家
果孰優論數每多驗言理或不售忠信人爵從孟軻老
於鄒仁者必有壽牖下死伯牛殺人取印綬嬖主乘軒
輒將貂續狗尾以冠加沐猴市朝日淘淘乾坤竟悠悠

璇穹列高真星月侍宸游朝裾曳明霞從珮鳴蒼瑯居
然視世濁不肯分天憂以此司罪福反自招愆尤我願
叫閭闔再拜面凝旒貪淫屏月宇兇惡驅羅喉仁賢迭
生旺憺邪永休囚帝閭不可扣金鎖閉玉樓龍眠正齁
睡鳥語徒喧啾路逢柯山翁深碧明雙眸笑我地下臣
何豫天上謀今夕有佳月且共登羅浮

贈李清隱道人

虞山絙西城尚湖遶其趾青屏照玉鏡屈摺十八里傳聞

漢真人丹成飛入水到今水不腥魚鼈長而美往年山
中人夜半忽驚起神鋒閃烈電爍爍光不已平明斲山
骨石函半鑿毀土花蝕蒼龍歲月不可紀玄靈啟幽秘
結構此經始雲香染衣佩嵐翠襲巾履道人方晏坐秋
葉打窗紙西風送詩句吹入千岩裏收拾費工夫遠來
將舉似見叟却忘言爐烟生斐几徐云乘興出興盡行
當止山中有緣事比欲相料理白鶴數日飢吾今且歸
耳

金匱要略
卷十五
贈筆生楊日新

雪屋夜明寒引紙一長吁貧無食肉相頗悔身業儒晨
出生謁入被褐而長鬚穎脫殊可喜文翰定自娛自言
中山徒常與陳玄俱醉曾揮草聖閒或寫桃符最愛王
逸少勉隨劉寄奴嗟生不自惜貌澤神亦枯世多宏肇
輩幸我非二蘇

贈筆生林君寶

我愛古人巧創物揜前聞遐哉蒼頡氏賴此蒙將軍將

軍絕地脉乃解開人文模寫不得力制作空云云祇今
千載下藝圃專策勲貶黜毛錐子褒進中書君工拙無
定在好惡有殊分老我翻墨藩落紙無煙雲有生來被
褐倩客試書裙雙金慙報贈隻字寄殷勤

題宋學古九天玄女數自云其師鍾堯臣得之
襄城柳下老翁所授

天九積陽數玄女夫何為廣陵亦健將乃惑一用之彼
術信誕謾此遇尤希奇珍重柳下翁仙隱未可知言天

以人證言數以理推守正死不避居貞凶可移堯富與
堯壽此理始無私顏貧與顏夭此性終無虧姑慎君子
術勿與老人期

別李宰

句曲一山縣東西俱百里三茅地有靈出宰多才美前
有趙與謝今有程與李李為山東望聲價高莫比清明
一古鏡冷浸玉泉裏敏哉製錦手洗却鳴琴耳仁心非
邀譽直道不容毀慈姑牧細民謙撝多士學館盛文

風講席究經旨有客東北來空齋兀書几彈鋏笑馮驩
下榻慚孺子樂雖足一瓢飽不望四簋既為邑之氓是
亦吾所耻饑餓欲賙之餽饘斯受已將歸重回首決去
負知己冉冉楚山雲悠悠斷江水

留別義塾諸公

婆娑七十翁已矣將焉求麋鹿違本性一朝出林丘故
園在何許駕言東南游人才盛吳會講貫多儒流內顧
衰朽質汙渠映清溝坐有歌驪駒將貽識者羞溽暑

困朱夏偃息時歸休南窗小容膝卧對紅葵榴年華不
我待青鏡照白頭祇今已後死巨海吹浮漚諸君幸少
壯勗學追前修

寄申屠御史

原注時謝御史被誅按申屠御史名致遠字大用以至元二十年庚

子拜江南行臺監察御史

御史帝耳目監察汭隋唐臺閣迴清風筆簡凌秋霜澄
清一攬轡驅狸走豺狼賢哉故安侯廉介尤剛方閉門
杜私謁上殿肅朝綱今侯有祖風學術尤章章出擁簿

書塵入薰書傳香冒襟漢石渠人物魯靈光終然百鷲
鷲不及一鸞鳳奉國信孜孜問塗何皇皇往歲金陵轍
前年古浙航鳴犢有餘哀河水空洋洋行役山川苦歸
興桑麻長廣陵挹雄勝平山弔淒涼瘦馬乏芻櫪寒妾
無帛囊家瘠道愈肥躬瘁名逾芳昔在東都季儉佞沉
忠良知幾獨子龍絕迹棲梁碣瞻烏止誰屋亦復可憐
傷

寄錄事王君玉

原注時管押
北人歸鄉

風沙眯行人日脚黃無光愁鴟蹲古木凍鴈拾餘糧荒
城雞犬寂古堠荆蒿長瘦馬兀冰塗龍塞天一方今晨
發申浦何日抵漁陽道傍轉徙氓啼哭勢倉黃情游散
不歸信美非吾鄉錦衣雖云樂無褐可憐傷南沂江悠
悠北視天茫茫遠煩公護視雨雪上河梁從事豈獨賢
簡書詎能忘嗟爾居者逸擁氊坐高堂且置勿復道擊
筑飲離觴

送周宣差除陝西廉訪僉事

原注長安人

昔人比貴宦綉錦以為衣當晝與夜行故鄉歸不歸每
評會稽章不及相州記公今往三秦身是綉衣使玉衡
直而平寶瑟和而清當知九州外生此千人英南人去
勿悲西人來勿喜明年當入覲垂紳佐天子

送陸同知北上二首

浙尾帶荒江土與材俱薄吳季獨終隱楚黃亦晚錯餘
子不足數眼明見卓落駮駟初歷塊青萍新淬鏑齒少
逾老心事邇存遠略百金重氣義千里赴言諾可期功

名會兼受生死託官途入幽薊詩句留殿閣出佐紫
陽城一麾真小却炳燭照吏奸良劑痊民瘼一庭秋水
淨萬戶春風樂河內泣留恂并州永思郭歸裝乍林丘
趣騎已沙漠梅花古驛寒別酒故人酌徑北道邳徐迂
西趨汴洛宮闕覩盛麗山川想寥廓成臯歎楚戰砥柱
窺禹鑿舊邦弔二虢古邑辨三亳望諸墓猶存戲馬臺
如昨燕趙誇蛾眉雲代珍狐貉壯士多屠沽逸人或岩
壑訪古記宜勒登高賦須作訂訛青簡在得句錦囊著

明年衣繡歸頗願聞其畧鴻鵠看高翔茗枝伏燕雀贈
言愧非顏出處其志畧

淳風日已薄恩義不相維吏無得於民民顧吏有辭政
化本不立刀筆事愈卑李侯今之人而行古所為外有
屠嘉直內無五倫私鉏奸如惡草護民猶嬰兒淪河甦
彼旱勸粟哺爾饑從容方報政代者俄及期庸吏推不
去良吏去復思誰與觀民風入境採吾詩

送郝仲明代歸

古之州縣吏久任各稱職任久則化行吏與民相得民
或不安業咎在吏數易代者如傳舍吏民不相識王嘉
朱浮疏每讀三太息暨城有賢佐溫良而端直為政知
大體人方飲其德瓜猶未及期旌已催行色中州固多
士此士去可惜老稚候城隅相邀卧車側

送葉仲實赴鹽官州判

我舟餘杭遊君馬薊北驟我衣素染塵君衣錦炫畫江
湖著閒散郡國需雋茂才高真小試儒腐乃大繆鞭讓

祖生先策甘之反後

送王安之無錫州判

龍峯隣吾州赤子久失乳或加手斲削誰肯頂摩拊有
客來嘉禾談我讀書塢口稱王侯賢可配循吏古廉不
受私謁公不畏強禦素秋下嚴霜陽春沃膏雨澤國鱸
正肥山泉茗尤苦州縣徒勞人揚歷安足數莫思金帶
橫長學彩衣舞

送宋春卿之官湘陰

乾霜落丹楓潮水清且淺雅志君山高離思湘江晚利
名登津要孤介分原注疎遠來暮彼雖嗟去思此難挽
何當升臺端繡斧煩臨遣

送顧伯玉麻陽簿

放州清江閘及此新雨涼故人得邂逅好語傾肺腸惜
哉廊廟器漂泊落湖湘前途阻勲業末技呈詞章營營
百年短浩浩萬古長共惜天下寶得志無相忘

送陳茂卿赴興國教授

彭城陳師道三州一學官高文曾蘇敬偉節章趙歎百
世有斯人嫡孫承後山君材中梓漆壤錯榛與菅藻芹
味苦淡輒當梁肉餐莫終三釜養竟墮一瓊寒榮枯數
前定出處身兩難腐鼠或青冥枳棘栖孔鸞升高足易
蹶恬處寢亦安逆君散花洲西上捲雪灘臯比第一義
子佩正聚觀士方從北學音已變南冠俎豆罷疑朴詩
書味轉酸何人力不變此道獨追還金谿有陸叟昔仕

乾淳間

原注陸曾
為興國教

送焦君實之采石學官

江水日以遠山花日又新先吾不復少後我皆成人之
子如良金出礦以精純又如山中木始遇雪發春送子
啟長途跋子升華津青雲題柱客白髮倚閭親有志皆
騰逸非才獨隱淪山林雙鬢古井臼一生貧宇宙無窮
事行藏各自身因風傳短句望月弔詞臣

送王行可赴宣城學官

閉關坐十年扣門得一士自言貧為養非謂學優仕執

手問何之贈言聊復爾清溪生芹藻流入泮宮水先令

我清心次令人潔已

原注太白宣城詩清溪清我心水色異諸水

鑄金師範

巧琢玉士習美六經懸日月顏孟元不死君欲從之遊
青燈茅屋底相逢莫相問擾擾鼓篋子

送嚴陵邵叔忠學錄歸侍二首

薄官如秋菰冷淡不堪食學宮如傳舍敝漏棲不得訪
君橋水東一榻可容膝中吳多佳士三載誰與適可憐
泮林鴟止醉桑黹黑束書歸去來釣臺秋風夕

黃甲舊書生明廷推一鶚歲莫戢羽翰靜聽華亭鶴盛
衰今昔異出處老少各乃翁信奇士之子亦不惡斥鷃
伏卑枝寄聲謝寥廓

送華仲實譯史入京

蒼頡何代人後乃有冰斯智者能創物此理不復疑國
朝重文字設官如經師君才實楚產北學尤恢奇冥鴻
登翰音威鳳呈羽儀青雲睨子貴皓首笑吾衰尚白玄
空守飛黃勢莫追祖行遲出郭東畎正耘耔

送吳仲寶入京

余年長汝父汝季復余從季也難為兄文史日從容兄
也實競爽立身期元宗可念玉雪子五月上盧龍棗榆
曝西日塵土吹炎風爾欲副爾志安得寧爾躬有方遊
可遠揚名孝乃終歸來拜嘉慶我酌壽汝翁

送趙季舒之燕

有客東南來白馬嘶北風問客將何之舉鞭指盧龍云
是漢家子出入明光宮古宮今焉在廢堵生秋蓬

送道成北遊

從游十載前，搃角君尚少。相逢十載後，我鬢雪爭曜。
修鱗縱巨壑，倦羽落荒嶠。盛衰各自異，巧拙更相誚。
義理浩無涯，經綸孰知要。立身如處女，被服善窈窕。
止令公子慕，莫博千金笑。

送錢君瑜歸嘉禾

海東有孤鶴，玉羽青冥間。衝風揚黃塵，吹落蓉城山。
蓉城何寥廓，山木多高寒。石泉翳荒蘚，飲啄常苦艱。
矯首

復南飛涼秋生羽翰願隨鴻鵠游不共雞鶩餐嗟爾不
羣志全身良獨難遠避鷹與鷂近防弋與彈仙機縱不
誤雲路終湯湯

送輔若晦南遊

天令中和春錦花柳絲織江山回淑氣車馬有行色問
君今何之白髮在高堂張弓箠兩矢出門志四方丈夫
信有志遊近不堪遠錫穴綆冷泉館娃弔荒畹青青三
吳道急雨飄客衣縱無譏小草恐有遺當歸

送袁仲野赴毘陵

儒吏不相得異器如薰猶儒視吏不屑吏嫉儒為仇俗
儒不知變譎譎孔與周事業叢委不理言大忤不酬嗟乎
鉛槧生謝此刀筆流安得經濟手一洗吾儕羞當路有
達官鄰境逢仁侯留情案牘間舉人拔其尤君抱汲古
學才識推兼優肯隨雞鶩爭會偕鸞鵠游高風動寥廓
茲土豈淹留獨憐老知己青燈守荒丘不堪明時用空
懷當世憂斯文付後死已矣復焉求

送黃雲心游松江

吾宗兩才子世亂身不免絕憐華亭鶴竟類東門大客
行因弔古寒日下荒坂并邑今豪雄往事海濤遠

送陳公南之松江并東山齋

我衰惜別離數日輒作惡老懷自當爾嘗恐兒輩覺君
器如璫璣似可寘臺閣莫辭簿書苦亦有宦游樂久厭
黃田魚去聽華亭鶴亭下有高士滴露草玄學持詩道
甫訊進拜復前却問我今何如癡頑勝如昨

古意二首送朱鶴臯

鴈蕩英英雲孤鳳雲中吟風吹五色羽墮此半水林桐
花作秋枯野桑空綠沉苦甚不致醉鴉食予何心鳳兮
歸去來岐山有高岑

蓬首寒機女枉顧生光輝一登君子堂松蘿相因依茂
陵喜新聘中路忽有違願垂堂上鏡照妾心中微生死
要有託悠悠空是非出門念遠道歲晏將安歸膏沐更
誰容為君疊羅衣

送陳子高

稜稜玉壺冰瑩潔絕纖罅無人手自將真之霜臺下海
東聞鶴唳清思方在野遲明有公事匆匆催上馬

送吳寬齋併謝惠詩

衰年八十一草露骨垂朽有客款荆扉甘言許吾壽假
如活百歲祇欠十有九辛勤拋書冊散誕耽棋酒時時
課小詩不自覺妍醜袖中新句見客驚欲走反顧仍
疾讀佳處輒肯首呼兒急傳觴晚喜得此友久之來告

別秋懷掛衰柳百金無所贈五言聊藉手

送天台陳審中

陳為台望族不數謝與錢此以科甲貴彼以婚姻連吾
猶及乃祖執鞭慕先賢亂後識嚴君握手吾同年事功
竟落落世慮日日煎衣冠一不振抱恨埋重泉君如丹
鳳雛五采何翩翩久客滄江上窮秋思浩然文運今再
明六甲一周天老我終白屋看子收青氈浙水東西流
北風送南船赤城幾日到鴈影夕陽邊

送楊伯可

齊魯多平原江湔田高下戢戢如魚鱗土籍誰主者富人擅其利失業憫孤寡方今用周禮天官出經野古法雖可行必得奉行者楊君古循良暨陽小民社原隰遍咨詢辭色每寬假經營始不擾期集乃多暇實惠甦困窮先聲走豪霸隴牛閒卧晝邑犬不驚夜當年經行處愛此憩棠舍鳩功首上計列郡居其下傾城出送君饑童控羸馬坐中有狂生出位獨難咤均為受廛氓關市

不親稼鄉胥上下手輕重意取捨仁公力救弊立法宜
少借聖朝天廣大焉用究纖罅議政罪甘誅矧避官長
罵

送張仲寶

持斧上東山伐木鳥羣呼道義不相敦朋友良可無嗟
我聚糠粃從君味膏腴方轡蹈先軌聯綬趨正塗事功
期遠致詩翰亦小娛但令交久長不恨別須臾歲律陰
崢嶸客程路盤紆人事况寡懽月異時復殊疎梅憶孤

嶼新柳懷清湖

送師本竹

魯國幾男子陋巷稱顏淵簞食何從出賴有負郭田養
志本無求求人志可憐蜀翁古奇士束書畏寒氊客來
擁氊坐客去挾書眠索供廣文飯催送司業錢玉瓶何
處酒翠釜誰家煙我乃遭數奇彼胡鍾美偏厄窮不自
憫靜退猶為賢揖士撤講席呼兒買歸船後游記何日
今別已高年感翁出處跡撫几心茫然握手出門去梅

雨暗江天

送徐允伯

古有淳寂鄉君與陶阮到每評伯倫頌謂勝周公誥山
間童負鍾臺下人拾帽短鞭跨遠碣破毯眠雪窖歸來
四壁立挾冊坐鄉校悠悠泮宮水羹有芹可筆案上方
醉吟室中已飢告長餅卧虛簷破金架空竈翠眉方與
齊頰頰忽自悼愁踏布衾裂羞拆海圖倒先生樂陶然
美睡呼不覺達士多迂拙庸兒競嘲噪豈知海上鯤姑

隱霧中豹歲晚空齋人杖屨辱相好百錢呼兒沽一榻
為君掃浩興忽長歌衰意亦旁譟銜孤月落椎壁四
鄰開明當遠行役寒雨映客棹秋江蒲稗深佇子平安
報

徐觀伯遠將徙海陵介吾姪來索詩徐故家兵
後流落三十年長子依許監倉客淮南因贅于
海陵迎二親就養坡公謂此事今無古或聞者
也感嘆之餘為賦二首

甲與吾同生君子行一周少年各豐裕歲晚懷百憂
菜地古城下我今手鋤耰君當往海陵絕江汎漁舟
駕言彼就養逝將老菟裘哀哉隨陽鴈止為稻梁謀
君看橫江隼萬里凌高秋

慈烏昔哺雛日夜望雛長安知風雨橫故巢墮草莽
烏羽日摧頽雛餓竟何往其一止海隅雌飛鳴相向
反哺若天性迎烏致其養我衰髮盡白兒長忽先喪
贈君慈烏篇老淚滴紙上

竹友以其季子將有遠行丐余一言余與翁游
視其季猶姪也為之言以勵其志

我生髮未燥汝父以詩鳴憂患涉世老襟義猶崢嶸晚
乃得二雛美不減徐卿季也繞弱冠詩壇將父兵愈湜
氣如虹侯門識奇英下馬呼小友相顧各自驚駉駉不
受羈歷塊千里行分臺栢森森霜氣壓百城汝游何所
挾兩字直而清銳進年倍壯靜退事飽更欲令從雅操
端肯迂脩程遠游重垂戒顯親須揚名但酬化鷗志足

慰舐犢情

余先世崇德人大父以上數世皆葬青鎮與習
上人有香火緣已巳歲上人訪先子于暨嗣孫
信講師寶侍杖屨余兒時侍側髣髴記其鬚眉
兵火後絕不相聞丙申歲師來自密印問訊丘
壠無恙而上人塔松長數十尺矣已巳距丙申
二十有八年如隔一世余與師白髮相對舉似
舊話感慨久之師為留數日將行索詩為別師

號古民性淳質不如葷飲酒博極羣書講說亶
亶不倦信而好古方外之逸民也

達士脫名檢高人落林丘體性未應殊作用終不侔講
師得三昧宗學貫九流曾對樹說法解使石點頭劫火
焚地水慈雲護松楸報恩心種種閱古事悠悠香火三
生願因緣再世游文辭重柳請衣服許韓留殷勤翻短
褐博雅愧前修

題質夫竹居

西園一叢竹歲久枝幹繁會見鸞鳳棲莫厭鳥雀喧玉
聲寒雨碎翠色朝煙昏蕭蕭黃素葉風吹擁籬根主人
避俗客青苔坐柴門勁節諒無比幽懷不可言

跋徐知事所藏契帖

原注徐山陰人

辨才將九十及見開皇初不知虞褚輩得似老僧書尤
物世希有昭陵劫灰餘玉函人不見繭紙乃蠹魚梅花
一片石猶自寶璫璣定武久荆棘長安復丘墟茂林有
陳迹今誰山陰居

題沈華父送行詩卷

原注乙卯九月

孟陽索吾錦景純奪吾筆老我嘆才盡秀句吐不出東
陽有行卷展玩已盈帙乘鴈豈為多買菜復求益嗟君
乃佳吏家世本經術一從冠惠文不肯事佔俾貞廉嚙
苦蘼和勁調玉瑟簿書謝囂塵車馬動行色君如擊水
鷗我似退風鷁出處兩忘言黃花秋淅瀝

題月心詩卷併記遇仙事云

東軒記待月縱筆說性命豈惟不知月實亦不知性文

雖歐蘇工理至關洛定人心如明月塵垢失清淨霧收
海氣澄天迥風力勁持我光明珠照此大圓鏡鏡中雙
綵鸞翔立請驂乘御宴影娥池神飈忽吹醒鸞飛曉鏡
空龍睡淵珠靜依舊碧潭心無復瓊樓興韓郎固有言
仙人未賢聖

題百鴈圖

青天一張紙羣鴈飛來遠秋渚蘆蕭蕭徘徊下清淺若
烹不能鳴一一俱不免

詠風

好風何處來天籟出衆竅披襟懷楚臺擊筑思高廟扶
搖九萬里自謂一息到安知大鵬運不滿斥鷃笑終當
謝蓬蒿振翼絕海嶠

夏雨

仲夏井泉溢雨聲集虛堂銀竹瀉高簷靜聽何浪浪蓮
葉不受水盤珠走低昂溽潤逼衣篝縫我新葛裳媿彼
作田人蓑笠排青秧出戶懶著屐掃地燒木香白晝生

金匱要略卷十五
睡思徐徐到羲皇夢覺聞鼓吹草蛙怒方塘竹尾起寒
煙濕螢度微光隣翁閉門卧中夕啼蒼黃三日絕薪賣
積潦勢頽墻

秋感

遙夜百感集白露下空庭秋風入草木衆葉會飄零甘
液始潤物履霜漸陰凝哀哉石榴樹讖語成添丁蘭艾
既同焚孰別臭與馨皇天默不語今古常青青

月

青天一片玉上有衆星列夜中光漸小讓此玻璃月白
兔卯時生桂子秋後結天上有山河兩界隔吳越何當
御嫦娥萬里駕飛轍太白為前驅綵鸞相繼發

徐德文索雪岡詩云已得而復失余尋舊藁亦
無見想滕六遣六丁取之去矣再賦一首

雪飛不擇地因高勢易積玉龍二百丈橫卧前山脊隨
香去尋梅路白無行跡鐵笛吹一聲驚裂蒼崖石

新移瑞香不得雨有嘆

瑞香兒女花艷潔而芳妍得之古精廬移置列檻前易
地費人力不出花自然深慮本先撥枝葉隨之顛是時
夏久旱不雨龜坼田林木且憂枯弱植豈自全既已厄
於人況復遭此天天與人讎之命也花自憐并筒灌朝
夕小潤培芳年封植豈無心榮枯自有緣何時回春風
笑挽司花僊攜手共樽酒醉卧雲錦邊

生意堂賦玉簪花得相字

原注時陳無遠
將之官攸州

娟娟秋蘭花綠葉何披猖沙鷺明玉羽冰蠶吐絲腸倩

盼宜素綯追琢少金相居然鐵石心愛此風露香何當
競春華亦復委朝霜折花三太息援筆臨清觴明年花
好在坐客忘瀟湘

老桂古字韻

人受氣之精百歲驚風雨少壯會有衰神散無復聚木
受氣之偏生旺寄於土枝幹老更奇花葉落仍吐君看
山中桂秋露滴金乳種者是何人賞者經幾主天香入
酒冽吸月空懷古素娥笑白髮對影獨起舞

詠松

老松如枯骸短松覆兒髮城中薪價高斤斧不時伐難
長虬龍姿免藏虎豹穴樵童出山暮步擔挑新月

泗濱石

荆山石有玉楚國無人知再獻猶弗售抱璞空自悲他
日遇良工乃始稱其奇寶傳數百載邯鄲又得之秦人
請城易趙氏以為疑不予寧負曲予之恐見欺相如奉
使往持璧指瑕疵衝冠遽如許睨柱欲何為衣褐已歸

趙湯鑊安足辭奇哉古若人掩卷空嗟咨是非定百世
成敗止一時天生此尤物前後成禍基有美當韞匱街
鬻誠非宜和氏不待價則足將尤誰人才國輕重璧豈
係安危相如真暴虎雖死悔莫追二子有遺憾仲尼真
吾師泗濱一片石不染自成緇上有華林字疑是故物
遺春官雅好古傳載煩文移主人不敢惜持貢白玉墀
埋光經幾年不與賞音期無意博連城得失輕毫釐二
事擬非倫聊以資吾詩

車

舟止奔牛堰始識丹陽車規製殊草草力不任馳驅淮
安距宿遷代之牛與驢軒蓋乃差大雙輪夾一輿軹衡
輓輒軹名物與古殊梓人不知經多以方言拘輪載亦
稍豐日行百里餘御者非王良陘杭不安車蒲輪召申
公養老宜徐徐干祿以為榮愧我非純儒小兒問金根
其制復焉如輿服漢最詳具載班范書慎勿似韓昶問
學當勤渠

挽趙益之

汝父昔吾友汝翁昔我師汝時侍親側楚楚玉雪兒稍
長從吾游學問乃大奇風木不待養垣室空遺基成立
汝有望修短吾莫推四世積善心一門無龐眉俯仰三
十載三喪路人悲受氣各有終勞生嗟奚為牆東荷鉏
叟夙受汝翁知老懷念疇昔不覺哀涕垂欲誌殿中墓
健筆慚退之

挽鄧友梅

蕭鼓何闐闐西風弔客船主人辭華屋轎車落荒阡
芙蓉一片石千古懷人賢喚醒梅花魂薦之秋菊泉